



Sviamaint Susch

La suprastanza cumünala es gnüda orientada da la persuna responsabla da l'uffizi da construcziun bassa sur dal stadi dal stüdi dal sviamaint da Susch. Il chantun ha evaluà e congualà trais variantas pel sviamaint. Per pudair cuntinuar a progettar, spetta il chantun uossa da la suprastanza cumünala üna posiziun clera a regard lur varianta favurisada.

S-chodamaint central – rimplazzamaint cumprimader dal glatsch

Ils indriz per la tecnica da la piazza da glatsch artificial sun bod 20 ons vegls. Pro l'ultima revisiun s'ha constatà cha ün cumprimader da la pompa da chalur chi dà inavo la chalur dal glatsch aint illa rait dal s-chodamaint central da chalur sto gnir müdà oura. La suprastanza ha deliberà il credit necessari pel rimplazzamaint da quista componenta.

Nouva centrala dal s-chodamaint central – surdatta lavurs planisader

Las lavurs da planisader per la nouva centrala da s-chodamaint central in Cul sun gnüdas surdattas seguaintamaing: architect ad Architectura Castellani srl, Scuol; direcziun da fabrica ad Architectura Maiolani srl, Zernez ed indschegner a Liun Quadri, büro d'indschegner a S-chanf.

Taxas da cura 2016 – recuors

La suprastanza ha trattà e decis sur da quatter recuors cunter las taxas da cura 2016.

Ruzön III – recumpra d'üna parcella da fabrica

Dal 2014 ha il cumün vendü a privats las prümas quatter parcelas da fabrica i'l quartier Ruzön III a Zernez. Üna da quellas parcelas nun ha pudü gnir surfabricada infra il temp pretais dal cumün. Perquai es la parcella gnüda scritta oura per cumprar. Sün la publicaziun nu sun entradas ingünas annunzchas, uschè cha'l cumün ha cumprà inavo la parcella da fabrica.